

### III. OUTRAS DISPOSICIÓNS

#### CONSELLERÍA DE EDUCACIÓN E ORDENACIÓN UNIVERSITARIA

*RESOLUCIÓN do 10 de agosto de 2011 pola que se aproban as bases para a realización de proxectos de innovación en dinamización lingüística en centros de titularidade da Consellería de Educación e Ordenación Universitaria para desenvolver no curso académico 2011-2012.*

A Lei orgánica 2/2006, do 3 de maio, de educación, establece o logro da competencia nas dúas linguas oficiais das comunidades autónomas con idioma propio como unha das finalidades da educación.

Por outra parte, os estudos máis actualizados sobre a adquisición de idiomas revelan que esta se fai en boa medida nas variadas situacións de comunicación que se producen fóra das aulas de lingua e que é imprescindible o uso do galego en diferentes contextos para acadar o seu pleno dominio.

O Estatuto de autonomía de Galicia recolle a obriga dos poderes públicos de garantir o uso normal do galego e de potenciar o seu emprego en todos os planos da vida pública, cultural e formativa, así como de dispor os medios necesarios para facilitar o seu coñecemento e de que a Administración educativa procure fomentar o uso da lingua propia da comunidade autónoma en distintos espazos e situacións de comunicación dos centros educativos.

O Decreto 79/2010, do 20 de maio, para o plurilingüismo no ensino non universitario de Galicia, aposta por afondar no desenvolvemento dos preceptos da Lei de normalización lingüística no tocante ao ensino e por reforzar a dimensión comunicativa do galego en relación con contextos vivos, facilitarlle ao alumnado unha oferta educativa que o axude a percibir a utilidade da lingua e que o capacite para o seu uso correcto e eficaz.

Pola súa banda, o Plan Xeral de Normalización da Lingua Galega conclúe que a nova realidade social en que nos movemos e os novos retos que nos propón demandan que o uso do galego se prolongue no contorno que rodea os centros, de xeito que os mozos e mozas galegos atopen nel espazos onde comunicarse con normalidade na lingua propia de Galicia. Así mesmo, o plan xeral anímanos a recoñecer que, dado que a nosa é unha lingua de futuro, debe ser presentada como tal, relacionándoa con ámbitos de interese para a mocidade.

Por iso, a través desta convocatoria, a Consellería de Educación e Ordenación Universitaria pretende fomentar o desenvolvemento de proxectos educativos innovadores que impliquen o uso da lingua galega e o coñecemento cultural que garanta unha plena competencia comunicativa neste idioma.

En consecuencia,

RESOLVO:

*Artigo 1. Obxecto da convocatoria.*

O obxecto desta disposición é convocar a realización de proxectos de innovación en dinamización lingüística e regular o procedemento para a súa selección.

Os proxectos deberán fomentar algún ou varios dos seguintes aspectos:

– O galego oral, coa creación de novos ámbitos de uso que favorezan a utilización da lingua dentro e fóra das aulas.

– O achegamento á lingua e ao coñecemento da realidade sociocultural galega por parte do alumnado procedente do estranxeiro e das súas familias.

– A colaboración con entidades culturais, asociativas, recreativas e deportivas, así como coas empresas locais, para favorecer o emprego da lingua galega e mellorar a súa valoración social.

– A relación da lingua galega coas tecnoloxías da información e da comunicación.

*Artigo 2. Número de proxectos e dotación económica.*

Entre todos os proxectos presentados serán seleccionados cinco, considerados como excelentes. Os seleccionados recibirán:

1. Unha dotación económica de 2.500 euros.

2. Unha xornada de asesoramento e orientación para o profesorado implicado e asesoramento durante o desenvolvemento do proxecto.

3. A difusión das experiencias a través da rede e a publicación dos materiais educativos producidos na web da Secretaría Xeral de Política Lingüística <http://www.xunta.es/linguagalega/>

#### Artigo 3. *Beneficiarios.*

Poderán participar nesta convocatoria os centros de titularidade da Consellería de Educación e Ordenación Universitaria que desenvolvan os proxectos presentados no curso académico 2011-2012.

#### Artigo 4. *Prazo de presentación.*

O prazo de presentación de solicitudes será dun mes, contado a partir do día seguinte ao de se publicar esta resolución no *Diario Oficial de Galicia*.

#### Artigo 5. *Presentación de solicitudes e documentación.*

1. Á solicitude, segundo o modelo que figura como anexo I desta convocatoria, deberá xuntárselle a documentación que se indica a seguir:

a) Unha copia das actas das reunións do claustro e do consello escolar do centro en que conste que estes organismos foron informados do proxecto.

b) O proxecto, cunha extensión máxima de 33.000 caracteres (espazos incluídos), do que se presentará unha copia en papel e outra copia en soporte óptico.

2. As solicitudes e demais documentación presentaranse no Rexistro da Xunta de Galicia, edificio administrativo San Caetano, s/n, 15781 Santiago de Compostela, ou nos lugares e na forma previstos no artigo 38.4 da Lei 30/1992, do 26 de novembro, de réxime xurídico das administracións públicas e do procedemento administrativo común. Se a solicitude se remite por correo, será necesaria a súa presentación en sobre aberto para que o funcionario de correos poida selala e facer constar a data antes de certificarla.

3. Unha vez presentada a solicitude, examínase para ver se reúne os requisitos exixidos e se vai acompañada da preceptiva documentación. En caso contrario, requírese a persoa solicitante para que, no prazo de dez días, emende e/ou complete os documentos e os datos que deben achegarse e advertírselle que, de non facelo así, se considerará que desistiu da súa petición e esta será arquivada, logo da resolución ditada nos termos previstos no artigo 42 da Lei 30/1992, do 26 de novembro, de réxime xurídico das administracións públicas e do procedemento administrativo común.

A xestión desta convocatoria realizaraa a Secretaría Xeral de Política Lingüística. Este departamento poderalles requirir aos solicitantes cantos documentos e aclaracións considere necesarios para tramitar o expediente e tamén poderá dispor que se leven a cabo as comprobacións oportunas dos datos achegados polos peticionarios.

*Artigo 6. Estrutura do proxecto e requisitos do centro.*

1. Cando menos, os proxectos deberán incluír os seguintes puntos:

- a) Xustificación do proxecto a partir da situación sociolingüística de partida do centro.
- b) Obxectivos que, a curto e longo prazo, se pretenden alcanzar.
- c) Desenvolvemento do proxecto en que se reflecta o eixe que o vertebra, actuacións estruturadas temporalmente e unha proposta metodolóxica.
- d) A utilización e o grao de implicación dos recursos humanos e materiais existentes no centro en beneficio do proxecto.
- e) A colaboración con institucións do contorno e outros centros educativos.
- f) O plan de avaliación con especial atención ao grao de incidencia do proxecto na mellora do uso da lingua galega por parte da comunidade educativa.
- g) As medidas que se pensan tomar para difundir o proxecto entre o alumnado, as familias e a comunidade educativa, para fomentar a súa participación e aproveitamento.

2. Requisitos.

Os centros que desexen participar nesta convocatoria deberán cumprir os seguintes requisitos:

- Presentar copia das actas das reunións do claustro e do consello escolar do centro en que conste que estes organismos foron informados do proxecto.
- Presentar un proxecto educativo que implique o maior número posible de alumnado do centro.

– Contar co compromiso dunha porcentaxe significativa do profesorado do centro para desenvolver o proxecto e para participar nas actividades de formación que se organicen para levalo a cabo.

– Contar coa participación do equipo de dinamización da lingua galega.

– Deberá prestarse unha atención especial á presentación, redacción e á corrección lingüística do proxecto presentado.

#### *Artigo 7. Comisión e criterios de selección dos proxectos.*

1. Comisión de selección. Para a selección dos proxectos que concorran á convocatoria, crearase unha comisión de selección que estará presidida pola subdirectora xeral de Planificación e Dinamización Lingüística, ou persoa en quen delegue, e integrada polos seguintes membros:

– O subdirector xeral de Ordenación e Innovación Educativa e Formación do Profesorado, ou persoa en quen delegue.

– A xefa do servizo de Xestión e Promoción Lingüística.

– O xefe de servizo de Ordenación, Innovación e Orientación Educativa.

– Un asesor ou asesora técnica da Secretaría Xeral de Política Lingüística.

– Un membro da Secretaría Xeral de Política Lingüística, que actuará como secretario ou secretaria, con voz e sen voto.

A comisión poderá dispoñer a constitución dunha subcomisión técnica especializada para colaborar na valoración daqueles proxectos que coide pertinentes, que poderá estar integrada por asesores e asesoras técnicos da Dirección Xeral de Educación, Formación Profesional e Innovación Educativa e da Secretaría Xeral de Política Lingüística.

2. Os membros da comisión e da subcomisión estarán suxeitos ás causas de abstención e recusación establecidas nos artigos 28 e 29 da Lei de réxime xurídico das administracións públicas e do procedemento administrativo común.

### 3. Criterios de valoración.

Valoraranse os proxectos atendendo aos seguintes criterios:

#### a) Interese educativo do proxecto (60%):

- O seu carácter innovador e a súa integración no proxecto educativo.
- Os obxectivos que persegue e a súa adecuación ao Plan Xeral de Normalización da Lingua Galega; a proposta metodolóxica e a formulación de actividades, escolares e extraescolares coa súa periodización; o tratamento dos contidos que se van desenvolver e o sistema de seguimento e avaliación.
- A adecuación do proxecto á proposta de organización e dotación material e humana existentes no centro.
- A súa contribución á eliminación dos prexuízos lingüísticos ou de cantas outras trabas impidan o uso habitual do galego por parte do profesorado e alumnado do centro, tanto dentro coma fóra das aulas.
- A súa contribución á posta en relación do galego cunha cultura de interese para a comunidade e con proxección de futuro.
- O acceso de alumnos e alumnas en igualdade de condicións e o fomento dos valores democráticos.
- As propostas de tratamento da diversidade, a atención ao alumnado con necesidade específica de apoio educativo e as medidas para fomentar a igualdade.
- A proposta de medidas realizada para a participación da comunidade educativa.

#### b) Viabilidade do proxecto (40%):

- A implicación en actividades a través das cales a comunidade educativa se compromete no desenvolvemento do proxecto e na mellora das prácticas escolares como garantía para a súa continuidade.
- O compromiso do profesorado coa lingua galega e coa realización de actuacións de formación que poidan organizarse durante o desenvolvemento do proxecto.

– A utilización de recursos existentes no centro.

– A garantía de continuidade do proxecto, atendendo ao compromiso do claustro para levalo a cabo, á súa estabilidade e á proposta de seguimento e desenvolvemento deste.

#### Artigo 8. *Resolución.*

A comisión de selección, unha vez estudadas as solicitudes presentadas, emitirá a proposta de resolución dirixida ao conselleiro de Educación e Ordenación Universitaria, quen resolverá.

A resolución publicarase no *Diario Oficial de Galicia*, na páxina web da Secretaría Xeral de Política Lingüística <http://www.xunta.es/linguagalega/> e no portal educativo <http://www.edu.xunta.es> no prazo máximo de tres meses, contados desde a publicación desta convocatoria; de non facerse así, as persoas solicitantes deberán entender que se desestimaron as súas solicitudes.

#### Artigo 9. *Pagamento.*

A cantidade destinada aos cinco proxectos excelentes é de 12.500 euros. O importe transferiráselles aos centros nun único pagamento, no período correspondente ao exercicio económico 2011. O seu pagamento farase con cargo á aplicación orzamentaria 09.03.151A.640.1 dos orzamentos do 2011, da Secretaría Xeral de Política Lingüística.

#### Artigo 10. *Coordinación dos proxectos.*

A dirección do centro designará a persoa coordinadora do proxecto de innovación en dinamización lingüística entre os membros do claustro, preferentemente con destino definitivo no centro, coa finalidade de garantir a continuidade deste en cursos sucesivos e que estea involucrado activamente no proxecto. A designación terá efecto para o curso escolar e, se a dispoñibilidade horaria o permite, coa asignación de horas, dentro do seu horario, en número suficiente para as funcións propias, aproveitando as marxes que ofrece a actual configuración do réxime horario do profesorado.

As funcións do coordinador ou coordinadora do proxecto son:

a) Asesorar o profesorado do centro durante o desenvolvemento do proxecto.

b) Establecer canles para a difusión da experiencia e para o intercambio de información entre a comunidade educativa e con outros centros e/ou outras entidades.

- c) Impulsar actuacións tendentes á ampliación e mellora do proxecto.
- d) Orientar o profesorado do centro sobre os recursos dispoñibles.
- e) Fomentar a creación de contidos educativos, especialmente os de tipo audiovisual e informático, por parte do profesorado do centro e a súa difusión a toda a comunidade educativa.
- f) Actuar de enlace coa Secretaría Xeral de Política Lingüística e a Dirección Xeral de Educación, Formación Profesional e Innovación Educativa.

*Artigo 11. Memoria de realización dos proxectos.*

Antes do 30 de xuño de 2012, a persoa coordinadora do proxecto elaborará unha memoria das actuacións levadas a cabo para a posta en marcha do proxecto que se enviará no prazo arriba indicado, co visto e prace da dirección do centro, e incluírase, ademais, na memoria final do curso que se lle remite á Inspección educativa.

Esta memoria deberá observar o grao de cumprimento dos obxectivos propostos, as actividades desenvolvidas, o grao de implicación do centro e da comunidade educativa, as actividades de formación, a produción de materiais, a avaliación realizada e as previsións de futuro.

O incumprimento de calquera das condicións establecidas para a súa concesión ou o non achegar a memoria suporá a obriga de reintegrar, total ou parcialmente, o importe percibido.

*Artigo 12. Asesoramento e seguimento.*

Os coordinadores territoriais de dinamización lingüística, sen prexuízo da colaboración que poidan prestar outras institucións ou organismos, ofrecerán apoio e asesoramento tanto na fase de elaboración dos proxectos coma na do seu desenvolvemento. Desempeñarán, así mesmo, funcións de seguimento dos proxectos nos centros da súa área de influencia.

*Artigo 13. Seguimento do proxecto.*

Con independencia do exposto no artigo anterior, a Secretaría Xeral de Política Lingüística e mais a Dirección Xeral de Educación, Formación Profesional e Innovación Educativa



levarán a cabo o seguimento dos proxectos, co fin de verificar a súa realización e os resultados logrados.

*Artigo 14. Recoñecemento da participación.*

A participación do profesorado implicado nos proxectos que resulten seleccionados acreditarase cunha certificación como participantes nunha actividade de innovación educativa. Así mesmo, farase constar nela a equivalencia a 30 horas de formación permanente do profesorado. Á persoa que desenvolva funcións de coordinación faráselle constar ese particular na súa certificación.

*Artigo 15. Difusión das experiencias e materiais elaborados.*

Os proxectos seleccionados serán publicados pola Secretaría Xeral de Política Lingüística na súa páxina web <http://www.xunta.es/linguagalega/> e no portal educativo <http://www.edu.xunta.es>

A presentación a esta convocatoria implicará, no caso dos traballos seleccionados, a colaboración nesta ou noutras accións de difusión que se organicen, así como a cesión dos dereitos de edición a favor do organismo que convoca.

Santiago de Compostela, 10 de agosto de 2011.

Jesús Vázquez Abad  
Conselleiro de Educación e Ordenación Universitaria